

meridiani demones, onocentauri, pilosi, sirena, lamia, ulula, struthiones, ericii, aspis, basiliscus, leo, draco, scorpius, princeps mundi huius, rector harum tenebrarum. Quamvis autem ex diversis istis agnominatibus dæmonum, diversa eorum genera ac studia non inepte colligantur, negandum tamen non est tum scriptores Christianos complures, tum ipsa quoque sacra Biblia earum plures promiscue tribuere omnibus illis spiritibus peccatoribus, non servato suo principio & relicto suo domicilio in iudicium magnæ diei æternis vinculis sub caligine asservatis.

- a) *De Præpar. Evangel. L. V. c. 3.* Posidonio placitam Etymologiam notavit *Macrobius Saturnal. l. 23.* b) *In Aurea Carmina v. 3. p. m. 45.* Hesiode eandem sententiam Plato tribuit, conf. *Lud. Vives ad Augustin. de C. D. IX, 11.* c) *De Civ. DEI L. IIX. c. 14. sic & L. IX. c. 19.* Equidem mavult *Histoire Critique de la Rep. des Lett. T. II. p. 246.* locum Paulinum *1 Cor. X, 20.* exponi de *Diis gentium* quam de *diabolis*. Uti vero Cl Editori libens concessero gentes dæmonas deos suos appellasse, non tamen negabit inde Paulum dæmonas illos malos spiritus statuisse, cum etiam v. 19. ab iis *idola* s. *deastros* probe distingvat. Neq; loca quæ *Knatchbull* in *1 Tim. IV, 1* allegat ex *LXX.* Interpp. negant, illos quoque *dæmonia* pro *idolis* ponendo *diabolo* significasse. d) *De Præpar. Evang. L. IV. c. 3.* e) *Ad Hesiodum.* f) *Advers. hæreses L. V. c. 24* g) *Hæreses LXIV p. 544.* conf. *Athenagoras in Legatione pro Christianis.* h) *Collatione Patrum VII. c. 17.*

§. III.

Theologia dæmonum homonymia.

Qualiscunqve vero malignorum istorum Spirituum diversitas, ipsos Theologicæ etiam cuicunque notitiæ sive aptos sive studiosos sive ea instructos magis aliis alios facile ostendit. Triplici autem potissimum ratione THEOLOGIA DÆMONUM dici potest. Aut enim denotat peculiarissimam diabolo & angelis ejus scientiam de DEO & rebus Divinis, quam ii ex propriis suis fingunt. Quam, cum quæ ex propriis loquuntur, mendacium existant, *falsam, κακίαν ἀδιδάκτον & ἀυλοδιδάκτον, ἀνθεολογίαν*, & *fœcundam omnis ἀθεολογίας matrem* ex rei veritate appellat *Celeb. Danus, Sev. Linsyrpius* (a). Aut signat veram illorum scientiam de DEO rebusque Divinis ipsosmet demones attingentibus & attinentibus, forinsecus ipsis quomodocunque advenientem. Aut denique notat DEI Divinarumque rerum ad hominem ejusq; salutem spectantium sive mysteriorum Gratiæ scientiam, quatenus ea in diabolis reperitur aut existere potest.